

Ekwo-ozì Kẹ̀ Mbù, Pyíta Deru

1 ¹Ekwo-ozì-a shì l'ẹ̀ka mbedua, bụ̀ Pyíta, bụ̀ onye-ishi-ozì Jizọ̀su Kéreshi. Ndu mu ede iya anụ̀ bụ̀ unubẹ̀ ndu Jiu ono, a chikashiru unu laa ọ̀hozo je ebugbaaru ono. Ndu eburu ẹ̀ Ọ̀ntosu; ndu eburu ẹ̀ Gale-shiya mẹ̀ ẹ̀ Kapadosiya; mẹ́chaa ẹ̀ Eshiya yẹ́e Bitiniya. ²Mbù unubẹ̀ ndu Chileke, bụ̀ Nna ọ̀taru mee; unu bụ̀ru nkiya. Chileke ọ̀taru unu; kẹ̀le o shikpọ̀oro ẹ̀ mbù maru l'unu l'a-bùru ndu nkiya. Tọ̀budu iya bụ̀; ọ̀ bya ezia Unme-dù-Nsọ̀; o mee unu: unu bụ̀ru nkiya; k'ọ̀phu unu a-nọ̀du anụ̀je-ru Jizọ̀su Kéreshi opfu; wafuà ẹ̀ Jizọ̀su ono egude mee ya safukota unu iphe-ẹ̀ji, unu mekọ̀taru g'ọ̀ ha.

Mu sù ẹ̀ Chileke mee g'eze-iphe-oma nkiya yẹ́e nchì-ọ̀du-doo rwube unu ẹ̀ka; rwube iya unu k'anỳinyi.

Ele ẹ̀nya ndzù ojejoje

³G'anyi jaa Chileke ajaja. Ọ̀o ya bụ̀ Nna Nnajiuphu anyi Jizọ̀su Kéreshi. Ọ̀ phụ̀waru anyi obu-imemini ọ̀phu nyịberu g'aa-tù ọ̀nu iya. O mewaru Jizọ̀su Kéreshi: o shì l'ọ̀nwu teta nọ̀du ndzù. Ọ̀ gbẹ̀ l'ono nwụ̀-phu anyi azù ọ̀zo. Nta-a bẹ̀ anyi elewaa ẹ̀nya ndzù ọ̀phu anyi a-dzùru jasù ẹ̀ tuutuutu ẹ̀ m̀mimiimii. ⁴Anyi elekwaphọ̀ ẹ̀nya l'anyi l'unu e-mechaa tũko gbarù mgba nweru iphe-oma, Chileke doberu unu l'imigwe; mbù iphe-oma ọ̀phu ta abyadù erehu erehu; ọ̀phu ọ̀ byadu emebiyihu emebiyihu; ọ̀phu ọ̀ yìdu kahù akahù. ⁵Ọ̀o kẹ̀le ọ̀o l'unu woru onwunu ye Jizọ̀su l'ẹ̀ka bẹ̀ meru g'o gude ọ̀ nọ̀du egudeje ike iya akwachi unu g'ọ̀ tọ̀ dù iphe l'e-me unu jeye teke oo-goshi unu ẹ̀ ya dzọ̀hawaruro unu. Ọ̀ kwarọ̀ l'ikpazù bẹ̀ oo-goshi iya unu.

⁶Ono bukpodanu iphe unu a-nọ̀duje ete ẹ̀swa iya; a makwarù-a l'unu jefutaje iphe-ẹ̀huka, dù iche iche, a-hù unu ama; ọ̀le ono bụ̀-a kẹ̀ nwa

nta-a; ọ tọ dudu g'oo-no-beru; 7k'ophu e-gude iphe-ehuka ono huta ekweta unu ama maru ?tọ dudu nu nyegenyege. Unu leanarọ mkpọla-ododo. Ọ bu iphe, vu oke aswa teme ọ nọdu emebiyihjekwanu emebiyihu. Ọ buleru-a l'ọku be aahuje iya gude maru ?ọ bu ọkpobe iya. Nokwapho g'aahuta ekweta unu ama g'a maru ?ọ bu ọkpobe iya. Ekweta ono be unu maanaru-a l'aswa iya ka ke mkpọla shii. A -dalechaa ya; ọ -buru ọkpobe ekweta; l'aa-jaa unu ajaja; mee g'unu nwua phoo g'iphóró, shi Chileke l'eka; aakwabekwapho unu ubvu. Ọ buru mbọku ono, Jizọsu Kéreshi a-bya ono be ọo-nwukota nno. ⁸Onye unu yeru obu; l'ebe abụ l'unu gude enya huma iya; unu ta ahumaduru iya l'enya ke nwanta-a; obenu l'unu kweru nkiya; ete eswa; ehu nọdu atso unu k'ophu aamadụ g'a-tu onu iya. ⁹Iphe ono, unu ele enya iya ono, rwua unu eka; mbụ l'obu unu be a dzotaruru.

¹⁰Ndu mpfuchiru, pfuru k'eze-iphe-oma ono, ee-mechaa meru unu ono; tokporu nwehu choo ndzota ono ọkpobe achocho. ¹¹Ephe mee g'ephe maru teke Unme Kéreshi, nọ phe l'ime epfu ama eka l'oo teke Kéreshi e-je iphe-ehuka; yee teke a-kwabẹ iya oke ubvu. ¹²Tobudu iya bu; Chileke bya emee ndu mpfuchiru iya ono, ephe maru l'ozu ono, ya ziru phe ono ta abudu ozi ehu phe; l'oo unubedua be e ziru phe iya g'ephe bya ezia. Nta-a be unu shiwa l'eka ndu-ozu ono, bu phe byaru ezia ya unu ono bya amaru iya. Ephe byaru bya egude ike ke Unme-du-Nso zia ya unu. Unme-du-Nso ono bu Chileke be shi l'imigwe ye phe iya l'ehu. Ozi ono, e ziru unu ono be aguchakwaa agu unwu-ojozi-imigwe. Ọ du phe g'a su l'o nwekporu g'e meru: o doo phe enya.

Umere, du Chileke ree

¹³Ọo ya bu; unu chikobe egomunggo unu l'ekalanu; g'ọ kwabe akwabẹ g'onye liru anamu l'upfu; unu esedeje onwunu esede; unu elekwapho enya eze-iphe-oma ono; Chileke e-meru unu teke Jizọsu Kéreshi e-goshi onwiya ono. ¹⁴Lẹ teke unu te eshidu mawaru ọkpobe-opfu ono be bu egu ejo-iphe, shi anoduje agu unu shi kpuru unu l'eka. Nta-a, unu buwaa ndu l'anuru Chileke opfu-a unu te ekwekwa g'egu ejo-iphe kpukwaduru unu egube ono, o shi kpuru unu ono. ¹⁵Iphe, unu e-mechia nta-a bukwa g'unu shi l'iphemiphe, unu eme goshi l'unu du nsọ; lẹ Chileke ono, bu iya kuru unu ono be dukwa nsọ. ¹⁶Lẹ dekwaru su: “Unu dukwa nsọ; lẹ mbedua dukwa nsọ.”

¹⁷Qobujeru; unu -nọdu epfu anu Chileke; unu eku iya Nna; mbụ Chileke ono, bu iya bu onye ekpejeepho onyenonu ikpe g'iphe, o meru gbaru; ophu ọ dudu onye oomeje ele enya l'iphu. Noo g'ọ gude unu je anodu ndzu unu l'ophu; tsuje iya ebvu lẹ mgboko ọwa-a, a byaru abyabya-a. ¹⁸Unu nyatajekwa iphe, o phuru Chileke temanu ọ gbata unu l'eka mkpokoro umere ono, unu nwutaru l'eka nna, nwuru unu phe ono. Iphe, o gude pfua aswa ishi unu gbata unu ta abukwa iphe emebiyuje emebiyihu

g'okpoga-mkpola-ochaa me mkpola-ododo. ¹⁹Iphe, o gude gbata unu bu mee ono, aswa iya paru eka ono, bu iya bu mee Kereshi. Kereshi ono be du ge nwaturu, e gude eje egwe ngweja; nwaturu, adukpodaa eka uta du iya l'ehu ilile; teme ebe o du du eka iphe, takuru iya l'ehu. ²⁰Oo iphe ono be Chileke hota-doru iya. O hotaru iya ro teme mgboko du; o rwua le nta-a, bu ikpazu-a; o gude k'iswi ehununu goshi iya ndiphe. ²¹Oo Kereshi ono be unu no l'eka iya kweta ke Chileke; o buru Chileke ono meru iya o shi lonwu teta dzuru ndzu; bya abukwaru iya pho kwaberu iya ubvu ophu shi l'imigwe. Oo ya bu; l'unu nowa Chileke l'eka elekwapho enya l'oo ya l'a-dzo unu.

²²Su-a; unu anoduje eme iphe, okpobe-opfu ono pfuru. Unu shi egube ono safukota iphe, du eji le ndzu unu; k'ophu bu l'unu byaru bya eyewa unwunna unu obu; ophu obu obu, unu yeru unwunna unu obu abukwa tuko-l'ehu-atuko-l'obu. Oo ya bu; unu ta ahakwa eye nwibe unu obu. Unu kukebejekwa ehununu gude okpoma unu l'ophu yee nwibe unu obu. ²³Kele e gudewaa opfu Chileke ophu dzu ndzu ojejeje nwuphu unu azu; ophu o to shidu le ndzu erehuje erehu; o chia ophu tee rehedu erehu. ²⁴Kele

“Nemadzu l'ophu dukota
g'eswa.

Mma ke nemadzu
dukwapo g'okoko
eswa ono.

Eswa -kpohuwaa nkubere
okoko iya erishihuje
dashihu.

²⁵Obenu l'opfu, Nnajiuphu
pfuru
a-duepho jeye l'ojejeje.”^a

Opfu ono be bu iya bu ozi-oma ono, a byaru ezia unu onoya.

Mkpuma, dzu ndzu; buru iya gude ulo

2 ¹Oo ya bu; unu tua onwunu ekpu tushia iphe, bukpo ejo-iphe, unu eme. Unu haa adzu uka; ophu o duhe onye a-buru tuko-l'ehu-atuko-l'obu; unu ahaa enya-pfurupfuru; haa epfubyishi nemadzu ibe unu. ²G'o buru g'egu era l'anoduje agu nwamee nshi-a bu g'opfu Chileke anoduje agu unu; mbu opfu Chileke ono, e te emerwushiduru emerwushi ono; oo ya bu g'unu e-gude iya vua evuvu; vuta k'ophu Chileke a-dzo unu. ³Le unu le Nnajiuphu megbabewaru iphe; unu huma l'o du ree.

⁴Su-a; unu byapfuta Nnajiuphu ono. Oo ya be bu mkpuma ono, dzu ndzu ono, Chileke gude tua okpa ulo iya ono. Mkpuma-a be ndiphe

^a 1:24-25 Gūnaa Azá 40:6-8.

hoḥuru tuphaa sù l'ò bụ ọgalemkpa. Ọle hụmanu; l'enya kẹ Chileke bẹ ọ gbẹchikwa bụru iya bẹ ọ hoṭaru kwabẹ ùbvù. ⁵Unubẹdua kwaphọ, bụ ndu dọ gẹ mkpuma, dzụ ndzu; bẹ Jizọsu Kéreshi gudekwa akpụ ọlo Unme-dụ-Nsọ; edozi ọgbo uke, dọ nsọ kẹ Chileke. G'unu bụru ndu a-noḍuje anụ Chileke ngweja, dọ iya ree. ⁶Kẹle e deru l'ẹkwo-opfu Chileke sù:

“Lenu; mu gudeakwa ẹka mu
toḡbo mkpuma lẹ Zayọnu.
Mkpuma ono bẹ mu hoṭaru;
ọ bụru
mkpuma vu oke-aswa;
tẹme ọ bụru itso gude ọlo.
Iphe, bụkpoo onye daphuberu
iya nù bẹ
ta abyakwa akwa izimanu.”

⁷Ọ kwa l'ẹhu k'unubẹdua, kwetarụ kẹ Kéreshi bẹ mkpuma ono bụ iphe, akwabẹ ùbvù; a bya l'ẹhu kẹ ndu te ekwedu kẹ Kéreshi bẹ;

“Mkpuma ono, ndu l'akpụ
ọlo jìkaru ono
mechaarụ bya aburu
mkpuma, gude ọlo.”

⁸Tẹme e dekwaphọ sù:

“Mkpuma ono bẹ bụkwa
mkpuma,
anoḍuje adụ ndiphe
upfu
bya abụkwarupho epfu,
ẹphe e-vukotajẹ daa iko.”^b

Noo kẹle ẹphe jìkaru ekweta opfu Chileke. Ọ bụru gẹ Chileke dobekpọhwaru l'ọo-dụ phẹ bụ onoya.

⁹Obenu l'unubẹdua bụ ndu Chileke gude ẹka iya hoṭa. Unu bụ ọgbo uke kẹ Chileke; bya aburu ọha dọ nsọ; bụru ndu Chileke nwe enwenwe; k'ophu unu e-me g'ajajẹ iya ajaja; mbụ onye ono kufutaru unu l'ọchii kuru unu ye l'iphóró iya, dọ biribiri ono. ¹⁰Ọ dukwaru teke unu eshidu bụru ndu kẹ Chileke; nta-a bẹ unu bụwaa ndu nkiya. Ete shidu phụaru unu obu-imemini; obenu lẹ nta-a bẹ ọ phụwaru unu obu-imemini.

Umere, gbaru ndu Kéreshi towaru l'ẹgbu

¹¹Ndu mu yeru obu; unu bụkwa nlwamulwa lẹ mgboko-a; tẹme unu byakwa iya phọ g'onye kpafutaru uri. Ọo iphe ono meru g'o gude mu

^b 2:8 Gūnaa Azá 8:14.

nòdu epfuru iya unu; epfushiru iya unu ike sù unu jiko g'unu te ewokwaru onwunu togboru ẹgu ẹjo-iphe, dù iche iche, anòduje agù nemadzu ẹgu ememe. Ọ kwa ndzù òphúú ono, Chileke nùru unu ono bẹ ẹgu eme ẹjo-iphe ono anòduje etso ọgu. ¹²G'umere unu shije ekiri l'iphu ndu ete ekwedu kẹ Chileke; k'òphu bù ẹphe -bokponu unu ibo l'unu bù ndu eme ẹjo-iphe; ẹphe eleanaa umere unu l'ò dúnukaru ree; ẹphe egudekwanù iya jaa Chileke ajaja mbòku ono, ọo-bya ekpee phẹ ikpe ono.

¹³Unu wozejekwa onwunu alì l'iphu ndu ọha meru ndu-ishi; m'òbvu Nnajiuphu; l'iphu ndu-eze, bù phẹ bẹ ike dù l'ẹka; ¹⁴mẹ l'iphu ndu bù ọ-chì-ọha, bù ndu e yeru g'ẹphe hùje ndu eme ẹjo-iphe ahùhù; ẹphe ajaje ndu ọphu eme iphe, dù ree ajaja. ¹⁵Noo kẹle iphe, dù Chileke l'uche bù g'unu gude umere ọma mechishia ẹhu-eswe ẹhu-eswe ndu amadù iphe anòduje epfuru unu ono. ¹⁶Kéreshi bẹ toakwaru unu l'ẹgbu. Ọle ọ tọ bù kwa g'unu bya eworu onwunu saarù eme iphe-ẹji ọgbo. Unu mejechia umere, gbaru ndu ejeru Chileke ozi. ¹⁷Unu kwabeje onyemoneye ùbvù. Iphe, bukpuo ndu bù unwunna; mbù ndu nọ Kéreshi l'ẹka; bẹ unu eyekotaje obu. Unu tsujekwa Chileke ebvu. Unu akwabejekwapho eze ùbvù.

Iphe-ẹhuka, Kéreshi jeru bù anyi iphe-leta-mee

¹⁸Unubẹ ndu ejeru nemadzu ozi; unu wozejekwa onwunu alì l'iphu nnajiuphu unu; kwabeje iya ùbvù. Iphe, bukpuo iphe, ẹphe sùru g'unu mee; unu mejekwa iya. G'ọ tọ bukwapo onye ọphu nnajiuphu iya duru odoo bya emeru ọnu ọtso bẹ a-kwabeje iya ùbvù kpoloko. G'onye ọphu nnajiuphu iya duru ẹhuka kwabejekwa iya phọ ùbvù. ¹⁹Chileke bẹ ẹhu atsojekwa ọtso mẹ ọ -bùru l'unubẹ ndibe iya gude iya ata nshi eje iphe-ẹhuka, byaru unu; mbù iphe-ẹhuka, e meru unu; unu nòdu eje l'ẹbe abù l'ò duru iphe, unu meru, dù ẹji. ²⁰Ọle ọ tọ bukwa: a -nòdu ahù ngu ahùhù iphe, dù ẹji, i meru ì nòdu ata nshi; ono ta agbakwarù g'a jaa ngu ajaja iya. Ọ kwa onye meru iphe, dù ree; a nòdu echi iya iphe ẹheni; onye ono nòdu ata nshi; noo onye Chileke a-ja ajaja iya bù ono.

²¹Noo l'ò kwa eje iphe-ẹhuka egube dù Chileke ree ono bẹ Chileke kudoru unu oku iya. Lẹ Kéreshi l'onwiya gudekwa k'iswi ẹhu unu jekwapho iphe-ẹhuka. Ono bularuro iphe-leta-mee bẹ o meru doberu unu; k'òphu unu a-nòdu anwù ẹka iya. ²²“Onye adùdu iphe-ẹji, o mejeru; ọphu ntuphu-ire adujeduru iya l'ọnu.” ²³A kwagokpokwaaru iya iphù; ọle o to phulataduru. E mee ya mkpawere; ọphu ọ dudu onye ọ sùjeru lẹ ya e-melata. Iphe, o mechiaru bù l'ò woru onwiya ye Chileke l'ẹka; mbù Chileke ono, bù onye-ikpe, ekpeje ikpe, pfulu nhamunha ono. ²⁴Kéreshi l'onwiya bẹ vutawaru iphe-ẹji, anyi meru g'ọ hakota l'ẹhu onwiya teke ono, a pfugburu iya loswebe onoya. G'anyibedua ono, nọ l'eme iphe-ẹji nwùhu anwùhu ono abya adzuru ndzù bùru ndu pfuluberekoto. Ọ kwa igbiri ẹchachi e chiru iya bẹ e gude mee g'unu wekorohu. ²⁵Noo l'unu shi eje

phururugbadaa g'aturu, ephu uto; obenu le nta-a be unu lwaphutawaru azu; lwapfuta onye ono, eche unu g'onye eche aturu; bya abukwarupho onye eleta ndzu unu enya ono.

Umere, gbaru nwanyi yee ji iya

3 ¹Nokwapho g'o du unube unwanyi, alu ji. Unu wozejekwa onwunu ali l'eka ji unu no. Oo ya bu k'ophu bu; o -nweru ji unu phe ndu ophu te eyejedu onu l'opfu Chileke; ephe ahuma eguru umere, unu eme gude iya bya emelaha opfu, Chileke pfuru; m'obetaruro ophu unu epfuduru phe ke Chileke. ²Noo kele ephe e-gudewaro enya phe ahuma umere, adudu eka uta du iya, unu eme eyeru phe; opfu l'unu atsu Chileke ebvu. ³Omemma unu ta agbakwaru g'o buru iphe, eme l'akpo-ehu, bu iya bu aswngashi egbushi; waa egude unwu iphe, e meshiru le mkpola-ododo kwaa onwunu ngwa; yele eye erengete uwe. ⁴G'o bujehiaru g'unu e-me dozirwee ime okpoma unu g'o to buru eka retoshihuru eretoshihu; g'o buru omemma k'eme odoo yee eji obu oyi. Iphemiphe ono be tukokwaru bukotaruru iphe, aswa paru eka l'enya ke Chileke. ⁵Kele oo egube ono bu gunwanyi shi egudeje eme omemma nkephe teke k'ichee. Ephe shi edoberu onwophe Chileke iche; teme ephe shi anoduje ele Chileke enya l'eka. Ephe shi ewozeje onwophe ali l'iphu ji phe. ⁶Oo egube ono be Sera shi-kwapho anuru Ebirihamu opfu ekuje iya nnajiuphu. Nta-a be unubedua bukwaa okpobe unwu Sera me unu -nodu emeje-a iphe, pfuru oto; ophu o dudu iphe, eyejekwadu unu ebvu.

⁷Unube ndu ophu bukwanu unwoke, alugbaa nwanyi; unu mejekwarupho nyee unu umere, du ree. Unu maru onwunu ehulalulu, unu alu nwibe unu. Unu kwabejekwa phe ubvu; eshinu unu maanaru-a l'unwanyi be uvohu ka b'adu; eme le nwoke. Unu letaje phe enya; mejeru phe iphe, mkpa iya duru phe. Noo kele unu l'ephe a-tuko shi l'eka Chileke gbaru mgba nweru eze-iphe-oma ono, bu iya bu ndzu ojejoje. Unu mejekwa umere, du egube ono k'ophu o to dudu iphe, akposhi unu epfu anu Chileke.

Ewere, eeme onye pfuberekoto

⁸Eka mu a-sube opfu ono ishi bu; g'uche unu bujekwaru nanu. G'iphe-ehuka, byaru nwibe unu rwuje unu l'ehu g'o rwuru onye o byaru. Unu yejekwa nwibe unu obu. Noo kele unu bu ndibe Chileke. Unu bukwaru ndu obu-imemini. Unu wozejekwa onwunu ali l'eka nwibe unu no. ⁹Onye-meru unu eji; unu te egudejekwa eme eji pfua ya ugwo iya. Onye -phuru unu iphu; unu te ephulatajekwa. O chikwaa iphe, unu e-mejehia bu g'unu gojehiaru onu-oma nu onye obu. L'iphe, Chileke kudoru unu oku iya bukwaga ya goru onu-oma nu unu.

¹⁰“L'iphe, bu onye o du ga

sù lẹ ndzù iya e-tse ogologo;
 tẹme ọ dukwa iya phọ g'a
 sù lẹ
 mbọku-mbọku abujeru
 iya k'oma;
 g'onye ono te egudehẹkwa
 ire iya tọ ikpoki;
 ọphu onye ọbu adzujekwa
 ọka.

11 G'onye ono gbakutaru
 eme iphe-ẹji azù
 watachia eme iphe,
 dù ree.

G'onye ono kukebeje ẹhu
 chọ iphe,
 bọ o -mee ya nchì-adu-doo.
 Ọ -chọta iya g'ọ tọ tųwokwa
 iya ẹka.

12 Noo kẹle Nnajiuphu,
 bọ Chileke
 bẹ anọdujeepho eleta
 ndu pfuberekoto
 ẹnya.
 Ọ nọdu angabejekwapho
 nchì numa epfufu,
 ẹphe ephu anù iya.
 Obenu lẹ ndu ẹjo-iphe
 bẹ ọoghajeru azù.”^c

¹³Sù-a; ?denukpoo onye sùru unu emekata mẹ ọ -nọdu ehe unu ihee eme iphe, pfuru nhamunha? ¹⁴Ọ -bukpooru nù l'unu a-nọdu eje iphe-ẹhuka; opfu l'unu eme iphe, pfuru-oto; g'ẹhu tsojekwa unu. Gẹ ndzù ta agujekwa unu m'ẹphe -nọdu eye unu ebvu; ọphu ọ dukwa iphe, unu eje-jekpoo ayọ oshi iya. ¹⁵Iphe, unu e-mejehia bọ g'unu gudeje obu unu g'ọ ha kwabeje Kéreshi, bọ Nnajiuphu unu ùbvù; gude goshi iya l'ọo ya bọ Nnajiuphu unu. Unu kwagebejephọ akwagebe tekenteke k'ọphu bọ l'ọ -duru onye jiru unu k'iphe ono, unu ele ẹnya iya ono; unu eyeeru iya ọkpobe ọnu; goshi iya iphe, meru g'ọ gude unu nọdu ele ẹnya iphe ono, unu ele ẹnya iya ono. ¹⁶Unu meje nno g'obu ataa awajekwanu unu mini; k'ọphu bukwanu o -nweru ndu l'epfuru unubẹ ndu kẹ Kéreshi ẹjo opfu; unu egude umere ọma ono, unu eme ono meru iphere kpua phẹ.

^c 3:10-12 Gūnaa Ebvu 34:12-16.

¹⁷L'ò kakwa ree lẹ nemadzu jeru iphe-ẹhuka; opfu l'oomo iphe, du ree; m'ò -bukwaru l'ò bu iphe, du Chileke l'uche bu onoya; eme lẹ nemadzu anwu onwu ejo-iphe, o meru. ¹⁸Kele Kéreshi l'onwiya jekwarupho akpo iphe-ẹhuka lanu nwuhu kele ndiphe eme iphe-ẹji. O buru onye ono, pfu-berekoto ono be nwuhu-chiru ndu apfubeduru-eka-oto; k'ophu oo-duta anyi dupfu Chileke. Ndiphe bu egbugbu mmanu be ephe gburu ogwehu iya. Obekwanu lẹ Unme Chileke meru iya o nodu ndzu. ¹⁹O buru ike Unme Chileke ono be o gude bahu lẹ maa jepfu ndu maa ono, a tuchiru lẹ mkporo ono je epfuaru phe opfu Chileke. ²⁰Lẹ teke ndiche ono, Nuwa kuru eze ugbo ono be ndu teke ono jikakwaru angabe nchi l'iphe, Chileke epfu; Chileke takpopho nshi ngabekotaru phe; ophu o dudu; jeye teke o nonyaru o haa mini; o bya erigbushikota phe. O buerupho nwa ndu abadu ishi be bahuru l'eze ugbo ono; iphe, ephe du bahu iya bu umadzu esato kpoloko. O buru mini ono, ugbo ono ese eli l'eli iya ono be Chileke shi dzoo phe. ²¹Mini ono be no onodu baputizimu, e gude adzo unu kwapho. O to bukwa l'a asafuje anyi inyi l'ehu; o chikwa l'anyi egudeje iya arwo Chileke g'o mee g'obu ta awa anyi mini. O buru leteta, Kéreshi shi l'onwu teta nodu ndzu be ooshije dzoo anyi. ²²O tetaru ono lashia je anodu l'imigwe lekutara Chileke, bu Nna. Iphe, bukota ojozi-imigwe gephe hakotakpoo; mekpoo iphemiphe, ike du l'eka; me iphemiphe, bukotakpoo ndu-ishi l'imigwe nodukota iya l'eka.

Ndzu ophuu

4 ¹Kéreshi be jeru iphe-ẹhuka teke o no lẹ mgboko-a. Oo ya bu; g'o buerupho ge k'iphe-ẹhuka ono du Kéreshi bu g'oo-duje unu; mbu g'unu kwakobekwa k'eye egube iphe-ẹhuka ono. O to dukwa onye jebejeru egube iphe-otsu-l'ehu ono lẹ mgboko-a o gbeshi jeye eka l'eme iphe-ẹji ozo. ²Oo ya bu; unu watakwapho eme iphe du Chileke l'uche. O buru g'unu e-gudewa iya ro ememe bu onoya lẹ nwa nta-a, unu nokwadu l'eliphe l'eka-a. Unu te eyeekwaru egu ejo-iphe agugbabe unwu-eliphe onu. ³Unu lewaro ime teke unu shi meta iphe, unwu-eliphe eme. Unu shi buru ndu iphere bvuru l'iphu; unu nodu ewojeru onwunu haaru egu ejo-iphe; yee angunuka mee yee ejo-uzere; me etsojeerupho acho-phe eka unu angu mee; yee anodu agwaphe agwa me ovu. ⁴Nta-a be o gbekwa bya adu ndu ono, ta amadu Chileke ono biribiri l'unu te etsojeeduru phe emephe ejo ememe ono; ophu unu l'ephe anodedu ndzu ola-l'iswi ono. Oo iphe ono meru g'o gude ephe nodu anoduje epfubyishi unu. ⁵Ole mboku, Chileke e-kpe phe ikpe abyaakwa. Oo mboku ono be ephe a-bya apfuru Chileke l'iphu; gude onu phe shi ishi lanu dokotaru iya iphe, ephe meru l'eli-mgboko-a; mbu Chileke ono gbekwa kwakobehawanu k'ekpe ndu nwuhuru anwuhu me ndu no ndzu lẹ mgboko-a ikpe ono. ⁶O kwa iphe ono meru g'o gude e je ezia ndu maa ozi-oma ono k'ophu e-kpe phe ikpe, duru ogwehu; ephe anodukwanu ndzu ophu Chileke no.

Egude iphe-oma, Chileke meru ngu jeeru iya ozi

⁷Su-a; teke iphemiphe-a l'abvu be dukwaa ntse. Oo ya bu g'unu sedeje onwunu; g'enya doo unu risaa; k'ophu unu a-duje ike epfu anu Chileke. ⁸Ophu kachakpoo nu bu g'unu yeekwapho nwibe unu obu okpobe eyeye kwaseru; kele egube n-yemobu ono ekpuchijekwa ikpoto iphe-aji. ⁹Unu kwajeru nwibe unu ebyaa. Ole g'unu ta agujekwa aphu iya. ¹⁰Eshi ophu Chileke megbawaru unu eze-iphe-oma, du iche iche; bya anuchakwapho onyemonye iphe-oma l'ehu l'ehu; g'onnyemonye gude iphe-oma ophu Chileke nuru iya mee iphe, a-baru nwibe iya urwu. O kwa unu mee nno l'o buru iya bu l'unu bu ndu letaru enya okpobe eleta l'iphe-oma, Chileke nuru unu. ¹¹O -duru onye epfu opfu; g'onnye ono pfuje ya pho g'o bu Chileke lonwiya epfu iya. O -duru onye eyetaru ndu ozo aka; g'onnye obu yetaje iya ge Chileke nu-beru iya ike. Oo ya bu; gee-shikwanu l'iphe, anyi emeje ememe ndiphe eshi Jizosu Kereshi l'eka kwabe Chileke ubvu; mbu onye ono, okwabe ubvu me eze ike, paru aka apaa; bu nkiya ono jasu le tuutuutu le mimimii. Nokwa g'o du.

Iphe-ehuka, ndu no Kereshi l'eka eje

¹²Ndu mu yeru obu; g'ejo iphe-ehuka ono, abyapfutaje unu ono ta adujekwa unu biribiri. Egube oke iphe-ehuka ono bukwa iphe, e gude eme ga maru ?unu noshiru-a ike l'eka Chileke. G'o to dujekwa unu g'o bu iphe, etu iya adujeduru be byapfutaru unu. ¹³O chikwaa iphe, unu e-meje bu g'ehu tsoje unu utso l'unu tukoru gbaru mba eje udu iphe-ehuka, Kereshi jeru; e -mechaa g'ehu akwata tsoo unu tsohikpoo ya unu ike mboku ono, Chileke e-goshi odu-biribiri Kereshi ono; mbu unu a-kwata gude obu unu g'o ha tee eswa. ¹⁴O -buru l'egude iswi eh Kereshi ako unu onu; be unu bukwa ndu a goru onu-oma nu; noo kele Unme Chileke, bu iya emeje g'unu gbaru mba l'odu-biribiri Chileke anopyabewaru unu l'ehu kwaseru. ¹⁵Ole o -duru onye l'eje iphe-ehuka; g'iphe-ehuka, ooje ta abukwaru k'iswi ochi, o gburu; ozoo iphuru o ziru; ozoo ejo-iphe ozo, o meru; ozoo kele o bu onye eseje opfu. ¹⁶O chia teke unu eje iphe-ehuka opfu l'unu bu ndu ke Kereshi; g'iphere iya ta adukwa unu; o chia g'unu kejeje Chileke ekele l'oo epha Kereshi be eeku unu.

¹⁷Le teke Chileke e-kpe ndiphe ikpe dukwaa ntse. O buru ndibe iya be oo-vuru uzo dabe ikpe obu l'ehu. Teke o bu le Chileke vu uzo dabe anyi egube iphe ono l'ehu; doanaa mu ro g'oo-dukpoo ndu ono, jikaru ozi-oma Chileke ono.

¹⁸“Teke o bukwanu le
g'e-me dzota onye
pfuberekoto
shihuru ike egube ono;

leanarọ g'ọo-duru
 ndu ta atsudu Chileke
 ebvu mewaro iphe,
 bukpo ndu ozo,
 ta anuduru Chileke
 opfu g'ephe ha.”^d

¹⁹Oo ya bu; g'iphe, bukpo ndu eje iphe-ehuka le g'o du Chileke g'ephe jee ya; mejekwa umere omaa. G'ephe wokwaru ndzu phe ye Chileke ono l'eka, bu onye ono, meru phe nu; teme o buru onye epfuje iphe; pfushia ike l'iphe, o pfuru.

Eleta ndu Chiochi enya

5 ¹Iphe-a, mu abya epfufu-a bukwa ndu e meru ogerenya Chiochi be mu epfu eyeru. Le mbedua, bu Pyita bukwa onye e meru ogerenya Chiochi g'unu bu teme mu gudekpoo enya mu humakota iphe-ehuka ono, Kereshi jeru onoya g'o hakotakpoo gberegedege. Mu yikwarupho le ndu onye le Kereshi gbawaa mgba nweru odu-biribiri iya, bu iphe, ata dudu g'oo-no-beru Chileke emee l'aa-huma-dzuru iya. ²Su-a; unu chejekwa unwu aturu Chileke ono nche, letaje phe enya ree. Unu egude obu unu meje iya egube o du Chileke l'uche; unu te emejekwa iya g'o bu iphe, e kebutaru unu ekebuta; o chia g'unu yeru ehul'eye ozi ono. Unu te ejekwa iya nweru ekpiri okpoga. ³Unu te emejekwa ndu ono, Chileke yeru unu l'eka ono g'ephe bu ohu, unu gbaru agbagba. G'umere unu buchikwaaru phe iphe-leta-mee. ⁴Oo ya bukwanu g'oo-buru teke onye-ishi ndu nche aturu ono byarupho k'egoshi onwiya l'oo-mee g'unu nodu ndzu ojejoje, bu iya bu obunggo, du biribiri, ata yidu mebyihu emebyihu.

⁵Nokwapho ge mu akakwarupho unube ndu ophu ka aburu unwegirima; unu wozejekwa onwunu ali l'iphu ndu bu ogerenya. Mbua; iphe, mu epfuru unu g'unu ha bu; g'iphemiphe, unu eme goshijekwa l'unu ewozeje onwunu ali l'eka nwibe unu no. Unu eyetajeru nwibe unu eka; kele “Chileke ajikajekwa ndu eku onwophe; o nodu emejekwanuru ndu ophu wozeru onwophe ali eze-iphe-oma.” ⁶Oo ya bu; unu wozeta onwunu ali l'iphu Chileke; k'ophu oo-woli unu eli me o -rwuepho. Chileke ono bukwa iya be bu Okalibe-Kakota-Ike.

⁷Unu tuko iphe, bukpo iphe, unu ayo oshi iya tuko ye Chileke l'eka; kele enya iya ta alufujedu alufu l'eka unu no. ⁸G'enya doo unu risaa g'unu nodu che nche l'onye ohogu unu, bu Nsetanu tsoakwaru ejephe g'oduma, tsoru aba hanyihanyi achọ onye oo-dzu-gbu lajashia taa. ⁹Unu pfu-chije iya uzo; unu apfu-shikwanaa ike l'ekwekwe, unu kweru ke Chileke; l'unu maakwaru-a l'unwunna unu g'ephe hakota l'eliphe-a be tukoru ejekota

^d 4:18 Gunaa Etu 11:31.

egube iphe-ehuka ono. ¹⁰Obenu l'oo Chileke ono, bu iya bu onye eze-iphe-oma kpakoru mikoo l'eka ono be kuru unu g'unu le Kereshi tugba buru nanu; oo ya bu g'unu l'iya atuko nodukota l'eka lanu, bu eka odu-biribiri iya ono, ata bvudu avvubu ono no. Oo ya bu l'unu -jetaepho iphe-ehuka ono nwanshi; yebdua lonwiya emee unu; unu adukota ree; mee unu; unu esihu ike; bya emekwapho unu; unu akabaa apfushi ike lekwekwe, unu kweru. ¹¹G'ikemike bukotaru nkiya jasu le tuutuutu le mijimiimii. Nokwa g'o du.

Ekele mkpochi-ishi

¹²Mu pfuakwaru nwakpuru opfu olemole deeru unu lekwo-ozia. O bu ru Sulivanusu be gude eka iya deeru mu iya. Sulivanusu ono bu nwanna anyi, mu maru l'o bu onye e gude ire iya eka. Su-a iphe, mu ederu iya unu bu ge mu gude iya mee g'obu shihu unu ike; teme mu nodu emekwapho ge mu gude iya pfuru unu l'iphemiphe ono be tukoru buru eze-iphe-oma, shi Chileke l'eka. Unu pfukwaru leze-iphe-oma ono; pfushia ya ike.

¹³Le ndu ke Chileke, no le Babilonu; mbu Chiochi, Chileke hotakwaru-pho g'o hotaru unu be lekelekwaro unu. Maku, bu nwa mu ekelekwaro unu. ¹⁴Unu kelekwa nwibe unu ekele; nmata phe akpa, du nsu. Ge Chileke mee g'unube ndu unu le Kereshi tugbaru buru nanu g'unu ha buru guu. Nokwa g'o du.